



苑詩類選卷之二十二

明監察御史包節輯按察司知事前給事中王交校

送行部一

餞別

梁簡文帝

行樂此南皮
謾餞臨華池
籜解篁開節
花閣鳥迷枝
窻陰隨影度
水色帶風移
徒命銜杯酒
終成憫別離

送別

同前

行行異海沂
依依別路岐
水苔隨纜聚
岸柳拂舟垂
石菌生懸葉
江槎流卧枝
燭盡悲宵去
酒滿惜將離

傷離新體

同前

傷離復傷離別後情鬱紆悽悽隱去棹惘惘愴還途戚
戚意不申轉顧獨沾巾前驅經御宿後騎歷河濬湖香
翼還憶清笳送後塵落日斜飛蓋餘暉承畫輪柳影長
橫路槐枝深隱人桂宮夕掩銅龍扉甲館宵垂雲母幃
朧朧月色上的的夜螢飛草香襲餘袂露灑沾人衣帶
堞凌城雲亂聚排枝度葉鳥爭歸盃中浮蟻不能酌琴
間玉徽調別鶴別鶴千里別離聲絃調軫急心自驚試
起登南樓還向華池遊前時篠生今欲合近日栽荷尚
不抽猶是銜杯共賞處今茲對此獨生愁樓高望曖曖
山川自分態偃師雖北連鞞轅已南背遠聽寂無聞遙
瞻自有闕含毫意不迷長歎情無賴

傷離別

梁元帝

朝望青陂道夜上白雲臺月中含桂樹流影自徘徊寒
沙逐風起春花犯雪開夜長無與晤衣單為誰裁

道別席中兵

朱超

數年共遊息一旦各聯翩莫論行近遠終是隔山川長
波漫不極高岫鬱相連急風亂還鳥輕寒靜暮蟬扁舟
已入浪孤帆漸逼天停車對空渚悵望轉依然

侍宴餞湘州刺史張續

庾肩吾

洞庭資善政層城送遠離九歌揚妙曲八桂動芳枝兩

足飛春殿雲峯入夏池郢路方遼遠湘山轉蔽虧何當
好風日極望長沙垂

與胡興安夜別

何遜

居人行轉軾客子暫維舟念此一筵笑分為兩地愁露
濕寒塘草月映清淮流方抱新離悵獨守故園秋

別劉孝先

前人

疲疴積未瘳伏枕倦長愁復念夜分首江上值徂秋陰
凝變遠色落葉泛寒流繁霜積曉纜輕冰繞夜舟曳裾
出兔苑引領望龍樓忽念荆臺側無為戚情遊

同柳吳興烏臺集送柳舍人

吳均

河陽一悵望南浦送將歸雲山離曉暖花霧共依霏流
連百舌呀下上陽禽飛桂舟無淹世玉軫有離微願君
詞蘭杜時採東臯薇

又集送劉餘杭

前人

王孫重離別置酒峯之巖透迤川上草參差澗裏薇輕
雲紉遠岫細雨沐山衣簷端水禽息窻上野螢飛君隨
綠波遠我逐清風歸

贈王桂揚別二首

前人

昔聞楊伯起拖玉振清風高華積海外名實滿山東自

有五都相非無四世公臨窻驚白日倚匣曳輕虹願持
鷓鴣羽歲暮依梧桐

其二

客子慘無歡送別江之干白雲方耿耿黃鳥尚關關糾
紛巫山石合沓洞庭瀾行衣侵曉露征舸犯夜湍無因
停合浦見此去珠還

贈鮑春陵別

前人

落葉思紛紛蟬聲猶可聞水中千丈月山上萬重雲海
鴻來倏去林花合復分所憂別離意白露下沾裙

酬別

前人

故人杯酒別天清明月亮露下寒葭中風起秋江上衣
染潺湲泣棹犯參差浪七首直千金七寶雕華仗生離
何用表賴此持相餉

別王謙

前人

嚴光不遂世流轉任飛蓬欲還天台嶺不狎甘泉宮離
歌玉絃絕別酒金卮空倘遺故人念僕在東山東

送沈記室夜別

范雲

桂水澄夜氛桂山清曉雲秋風兩鄉怨秋月千里分寒
芝寧共採霜猿行獨聞捫蘿勿遺我折桂方思君

別詩

前人

孤煙起新豐候鴈出雲中草低金城霧木下玉門風別
君河初滿思君月屢空折桂衡山北摘蘭沅水東蘭摘
心馬寄桂折意誰通

秋日別庾正員

張正見一作徐陵

征途愁轉旆連騎慘停鑣朔氣陵疎木江風送上潮青
雀離帆遠朱鷺別路遙唯有當秋月夜夜上河橋

新亭送別

前人一作徐陵

鳳吹臨伊水時駕出河梁野燎村田黑江秋岸荻黃隔
城聞上鼓迴洲隱去檣神襟憂遠別流涕極清漳

別毛永嘉

徐陵

願子勵清規歸來振羽儀嗟余今老病此別恐長離白
馬君來哭黃泉我詎知徒勞脫寶劍空挂隴頭枝

江津送劉光祿不及

陰鏗

依然臨送渚長望倚河津鼓聲隨聽絕帆勢與雲鄰泊
處空餘鳥離亭已散人林寒正下葉釣晚欲收綸如何
相背遠江漢與城闈

送始興王

前人

良守別承明枉道暫逢迎去帆收錦紵歸騎指蘭城紛
糾連山暗潺湲派水清桂晚花方白蓮秋葉始輕背飛
傷客念臨岐憫聖情分風不得遠何由送上征

送別裴儀同

王褒

河橋望行旅長亭送故人沙飛似軍幕蓬卷若車輪邊
衣苦霜雪愁貌損風塵行路皆兄弟千里念相親

別陸子雲

前人

解纜出南浦征棹且凌晨還看分手處唯餘送別人中
流搖蓋影邊江落騎塵平湖開曙日細柳發新春滄波
不可望行雲聊共因

別王都官

前人

連翩憫流客悵愴惜離羣東西御溝水南北會稽雲河
橋兩隄絕橫岐數路分山川遙不見懷袖遠相聞

別張洗馬樞

庾信

別席慘無言離悲兩相顧君登蘇武橋我見楊朱路關
山負雪行河水乘冰渡顧子着朱鷺知余在玄兔

贈別洗馬表朗

江總

賈誼登朝日終軍對奏年校文升廣內撫劍入崇賢奇
才殊艷逸將別愛畱連驅車命鏡管拱坐面林泉池寒
稍下鴈木落久無蟬霧侵山上月霜開石路煙高談無
與慰遲爾報華篇

別袁昌州

前人

河梁望隴頭分手路悠悠徂年驚若電別日欲成秋黃

送行部
卷五
九
鳴飛飛遠青山去去愁不言雲雨散更似東西流

別賓化侯

前人

石關通越井蒲澗邇靈州此地何遼夙羣英逐遠遊高
才袁彥伯令譽許文休悠焉值君子復此映芳猷嶠函
多險澁星瑄壯環周分歧泣世道念別傷邊秋斷山時
急霧平海若無流驚鷺一羣起哀猿數處愁是日送歸
客為情自可求終謝能鳴鴈還同不繫舟其如江海泣
惆悵徒離憂

別周記室

王冑

五里徘徊鶴三聲斷絕猿何言俱失路相對泣離尊別

意悽無已當歌寂不喧貧交欲有贈掩涕竟無言

送蔡君却入蜀二首

孔德紹

金陵已去國銅梁忽背飛失路遠相送他鄉何日歸

其二

靈關九折險蜀道二星遙乘查若有便希泛廣陵潮

送別

釋智才

鏡中辭舊識灞岸別新知年來未應老祇為數經離

送庾羽騎抱

鄭公超

舊宅青山遠歸路白雲深遲暮難為別搖落更傷心空
城落日影迴地浮雲陰送君自有淚不假聽猿吟

送晉熙公

尹式

太行君失路扶搖我退飛無復紅顏在空將白首歸色
移三代服塵化兩京衣道窮方識命事去乃知非西候
追孫楚南津送陸機雲薄鱗逾細山高翠轉微氣隨流
水咽淚逐斷絃揮但令寸心密隨意尺書稀

別送常侍

前人

遊人杜陵北送客漢川東無論去與住俱是一飄蓬秋
鬢含霜白衰顏倚酒紅別有相思處啼鳥雜夜風

送金敬陵入蜀

崔信明

金門去蜀道玉壘望長安豈言千里遠方尋九折難西

上君飛蓋東歸我挂冠猿聲出峽斷月彩落江寒從今
與君別花月幾新殘

送別

李百藥

眷言一杯酒悽愴起離憂夜花飄露氣暗水急還流鴈
行遙上月虫聲迴應秋明日河梁上誰與論仙舟

送盧主簿

王勃

窮途非所恨虛室自相依城闕居年滿琴尊俗事稀開
襟方未已分袂忽多違東巖富松竹歲暮幸同歸

餞韋兵曹

前人

征驂臨野吹別袂憐江垂川霽浮煙歛山明落照移鷹

風凋晚葉蟬露泣秋枝亭臯分遠望延想間雲涯

白下驛餞唐少府

前人

下驛窮交日昌亭旅食年相知何用早懷抱即依然浦樓低晚照鄉路隔風煙去去如何道長安在日邊

送杜少府之任蜀川

前人

城闕輔三秦風煙望五津與君離別意同是宦遊人海内存知己天涯若比鄰無為在岐路兒女共沾巾

羈遊餞別

前人

客心懸隴路遊子倦江干槿濃朝砌靜篠密夜窻寒琴聲銷別恨風景駐離歡寧覺山川遠悠悠旅思難

送梓州周司功

楊炯

御溝一相送征馬屢盤桓言笑方無日離憂獨未寬舉杯聊勸酒破涕暫為歡別後風清夜思君蜀道難

送李庶子致仕還洛

前人

此地傾城日由來供帳華亭逢李廣騎門接邵平瓜原野煙氛匝關河遊望賒白雲斷巖岫綠草覆江沙詔賜扶陽宅人榮御史車灞池一相送流涕向煙霞

送臨津房少府

前人

岐路三秋別江津萬里長煙霞駐征蓋絃奏促飛觴階樹含斜日池風泛早涼贈言未終竟流涕忽霑裳

送行部
卷五
九
送豐城王少府

前人

愁結亂如麻，長天照落霞。
離亭隱喬樹，溝水侵平沙。
左尉才何屈，東關望漸賒。
行看轉牛斗，持此報張華。

送鄭州周司功

前人

漢國臨清渭，京城枕蜀河。
居人下珠淚，賓御促驪歌。
望極關山遠，秋深煙霧多。
唯餘三五夕，明月暫經過。

送鄭司倉入蜀

盧照鄰

離人丹水北，遊客錦城東。
別意還無已，離憂自不窮。
隴雲朝結陣，江月夜臨空。
關塞疲征馬，霜氛落早鴻。
潘年三十外，蜀道五千中。
送君秋水曲，酌酒對秋風。

送梓州高參軍還京

前人

京洛風塵遠，褒斜煙霧深。
北遊君似智，南飛我異禽。
別路琴聲斷，秋山猿鳥吟。
一乖青岳酌，空佇白雲心。

還京贈別

前人

風月清江夜，山水白雲朝。
萬里同為客，三秋契不凋。
戲鳧分斷岸，歸騎別高標。
一去仙橋道，還望錦城遙。
送幽州陳參軍赴任寄呈鄉曲故老

前人

薊北三千里，關西二十年。
馮唐猶在漢，樂毅不歸燕。
人同黃鶴遠，鄉共白雲連。
郭隗池臺處，昭王尊酒前。
故人

當已老舊壑幾成田紅顏如昨日衰鬢似秋天西蜀橋
應毀東周石尚全灞池水猶綠榆關月早圓塞雲初上
鴈度樹欲銷蟬送君之舊國揮涕獨潛然

大劍送別劉右史

前人

金碧禺山遠關梁蜀道難相逢屬晚歲相送動征鞍地
咽綿川冷雲凝劍閣寒倘遇忠孝所為道憶長安

綿州官池餞別

同賦灣字

前人

輜軒遵上國仙氣下靈關尊酒妨無地聯袂喜暫攀離
言欲贈策高辨正連環野徑遊雲斷荒池春草班殘花
落古樹度鳥入澄灣欲叙他鄉別幽谷有緜蠻

送吳七遊蜀

駱賓王

日觀分齊壤星橋抵蜀門桃花嘶別路竹葉瀉離尊夏
老蘭猶茂秋深柳尚繁霧銷山望迥風高野聽喧勞歌
徒欲奏贈別竟無言唯有當秋月空照野人園

秋日餞尹大之京

前人

挂瓢余隱舜負鼎爾干湯竹葉離尊滿桃花別路長低
河耿秋色落月抱寒光素書如可嗣幽谷佇賓行

餞鄭安陽入蜀

前人

彭山折坂外井洛少城隈地是三巴俗人非百里才畏
途君悵望別路我徘徊心賞風煙隔容華歲月催遙遙

分鳳野去去轉龍媒遺錦非前色鳴琴即舊臺劍門千
仞起石路五丁開海客乘查渡仙童馭竹迴鳧將離鶴
遠思逐斷猿哀唯有雙鳧鳥飛去復飛來

送劉少府遊越州

前人

一丘余枕石三越爾懷鉛離亭分鶴蓋別岸指龍川背
夏蟬聲斷來寒鴈影連如何溝水上悽斷聽離絃

送郭少府

前人

開筵枕德水輟棹艤仙舟貝闕桃花浪龍門竹箭流當
歌悽別曲對酒泣離憂還望青門外空見白雲浮

送費六還蜀

前人

星樓望蜀道月峽指吳門萬行流別淚九折切驚魂雪
影舍花落雲陰帶葉昏還愁三徑晚獨對一清尊

送友人之新豐

劉希夷

日暮秋風起關山斷別情淚垂黃葉下愁向綠尊生野
路歸驂轉河洲宿鳥驚賓遊寬族宴王事促嚴程

餞李秀才赴舉

前人

鴻鵠振羽翩翩飛入帝鄉朝鳴集銀樹暝宿下金塘日
月天門近風煙夜路長自憐窮浦鴈歲歲不隨陽

洛中晴月別殷四入關

前人

清洛浮橋南渡頭天晶萬里林葉秋晴看石瀨光無數

曉入圓潭浸不流微雲一點曙煙起南陌憧憧通行子
欲將此意與君論復道秦關向千里

送光祿劉主簿之洛

李嶠

函谷雙嶠右伊川二陝東仙舟宵將隔芳華暫云同朋
席餘歡盡文房舊侶空他鄉千里月岐路九秋風背櫂
嘶班馬分洲叫斷鴻別後青山外相望白雲中

餞駱四二首

前人

平生何以樂斗酒夜相逢曲中驚別緒醉裏失愁容星
月懸秋漢風霜入曙鍾明日臨溝水青山幾萬重

其二

甲第驅車入良宵秉燭遊人追竹林會酒獻菊花秋霜
吹飄無已星河漫不流重嗟歡賞地翻召別離憂

送李安邑

前人

落日荒郊外風景正淒淒離人席上起征馬路旁嘶別
酒傾壺贈行人掩淚啼慙慙御溝水從此各東西

又送別

前人

岐路方為客芳尊暫解頰人隨轉蓬去春伴落梅還白
雲渡汾水黃河繞晉關離心不可問宿昔鬢成班

送東蔡王學士無兢

陳子昂

寶劍千金買平生未許人懷君萬里別持贈結交親孤

松宜晚歲衆木愛芳春已矣將何適無令白髮新

送客

前人

故人洞庭去楊柳春風生相送河洲晚蒼茫別思盈白
蘋已堪把綠芷復含榮江南多桂樹歸客贈生平

送殷大入蜀

前人

蜀山金碧路此地饒英靈送君一為別悽斷故鄉情夏
雲生極浦斜日隱離亭坐看征騎沒唯有遠山青

送梁李二明府

前人

負書猶在漢懷策未聞秦復此窮秋日芳尊別故人黃
金裝屢盡白首契逾新空羨雙鳧鳥俱飛向玉輪

送別陶七

前人

黃鶴煙雲去清江琴酒同離帆方楚越溝水復西東美
蓉生夏浦楊柳送春風明月相思處應對菊花叢

餞唐州高使君赴任

盧藏用

餞酒臨豐樹褰帷出魯陽蕙蘭春已晚桐栢路猶長祖
逖方城鎮安仁外氏鄉從來二千石天子命惟良

又

李义

淮源之水清可以濯君纓彼美稱才傑親人行政聲歲
寒疇曩意春晚別離情終嘆臨岐遠行看擁傳榮

又

徐彦伯

香萼媚紅滋垂條紫綠絲情人拂瑤袂共惜此芳時
驪已躑躅鳥隼方葳蕤岐子望太守流潤及京師

又

韋元旦

桐栢膺新命芝蘭惜舊遊鳴臯夜鶴在遷水早驚求傳
擁淮源路尊空灞水流落花紛送遠春色別離憂

又

馬懷素

外牧資賢守斯人奉命俞淮南應建隼渭北軫分符坐
歎煙波隔行嗟物候殊何年昇美課廻看此城隅

又

岑義

蒼茫南塞地明媚上春時目極傷千里懷君不自持征

車別岐路斜日下崦嵫一歎輶軒阻悠悠即所思

又

蘇頲

春日奏對時東風搖蕩夕浩然思樂事翻復餞征客淮
水常流清楚山暮雲白勿言行路遠所貴專城伯

又

張說

常時好閑燕朋舊少相過及爾宣風去方嗟別日多淮
流春婉婉汝海路蹉跎百年屢分散歡言復幾何

錢許州宋司馬赴任

盧藏用

國為休徵選輿因仲舉題山川襄野隔朋酒灞亭睽零
兩征車警秋風別驥嘶離歌一曲罷愁向勿淒淒

又

宋之問

潁郡水東流荀陳兄弟遊偏傷茲日遠獨向聚星州河
潤在明德人康非外求當聞力為政遙慰我心愁

又

李又

展驥旌時傑談雞美代賢暫畱仙掖務追送近郊筵地
慘金商節人康壁假田從來昆友事成以佩刀傳

又

薛稷

令弟與名兄高才振兩京別序聞鴻鴈離章動鶴鶴遠
朋馳翰墨勝地寫丹青風月相思夜勞望潁川星

又

徐堅

舊許星車轉神京祖帳開斷煙傷別望零雨送離杯辭
燕依空遠賓鴻入聽哀分襟與秋氣白夕共悲哉

錢唐永昌赴任東都

沈佺期

洛陽舊有神明宰輦轂由來天地中餘邑政成何足貴
因君取則四方同

又

宋之問

郎官出宰赴伊瀍征傳駸駸灞水前此時悵望新豐道
握手相看共黯然

又

李適

聞道飛鳧向洛陽翩翩矯翼度文昌因聲寄意三花樹

少室巖前幾過香

又

李又

田郎才貌出咸京
潘子文章向洛城
願以深恩畱善政
當令強項謝高名

又

劉憲

始見郎官拜洛陽
旋開近侍發雕章
緒言已勗暮年政
綺字當生滿路光

又

徐彥伯

金谿碧水玉潭沙
鳧鳥翩翩弄日華
鬪雞香陌行春倦
為摘東園桃李花

又

馬懷素

聞君出宰洛陽隅
賓客稱觴餞路衢
別後相思在何處
祇應闕下望仙鳧

又

崔日用

洛陽桴鼓今不鳴
朝野咸推重太平
冬至冰霜俱怨別
春來花鳥若為情

又

武平一

聞君墨綬出丹墀
雙鳥飛來佇有期
寄謝銅街攀柳日
無思粉署握蘭時

宋公宅送審諫議

宋之問

宋公爰創宅庾氏更誅茅間出人三秀平臨楚四郊漢
臣來絳節荆牧動金鏡尊溢宜城酒笙裁曲沃匏露荷
秋變節風柳夕鳴稍一散陽臺雨方隨越鳥巢

送趙司馬赴蜀川

前人

餞子西南望煙縣劍道微橋寒金鴈落林曙碧雞飛職
拜輿方遠仙成履會歸定知和氏璧遙掩玉輪輝

送合宮蘇明府

前人

鉉府誕英規公才天下知謂成羔鴈族繼入鳳凰池赤
縣求人隱青門起路岐翟迴車少別鳧化舄遙馳神哭
周南境童歌渭北垂賢哉荀奉倩袞職佇采儀

送武進鄭明府

前人

絃歌試宰日城闕賞心違北謝蒼龍去南隨黃鵠飛夏
雲海中出吳山江上微旼謠豈云遠從此慶緇衣

送永昌蕭贊府

前人

柳變曲江頭送君函谷遊弄琴寬別意酌酒醉春秋戀
本亦何極贈言微所求莫令金谷水不入故園流

送李侍御

前人

行李戀庭闈乘輶振彩衣南登指吳服北走出秦畿去
國夏雲斷還鄉秋鴈飛旋聞郡計入更有使臣歸

送楊六望赴金水

前人

借問梁山道，嶽岑幾萬重。遙州乃作路，絕壁劍為峯。惜別路窮此，畱歡意不從。憂來生白髮，時晚愛青松。勿以西南遠，夷歌寢盛容。台階有高位，寧復久臨邛。

餞湖州薛司馬

前人

別駕促嚴程，離筵多故情。交深季作友，義重伯為兄。鎮靜移吳俗，風流在漢京。會看陳仲舉，從此拜公卿。

送杜審言

前人

卧病人事絕，聞君萬里行。河橋不相送，江樹遠含情。別路追孫楚，維舟弔屈平。可惜龍泉劍，流落在豐城。

送趙六貞固

前人

目斷南浦雲，心醉東郊柳。怨別此何時，青芳來已久。與君共時物，盡此盈尊酒。始願今不從，春風戀携手。

南中送蔣五岑向青州

張說

老親依北海，賤子棄南荒。有淚皆成血，無聲不斷腸。此中逢故友，彼地送還鄉。願為江楓葉，隨君渡洛陽。

幽州別徐長河行先

前人

惠愛交千里，辛勤世事多。荆南久為別，薊北遠來過。寄目雲中鳥，畱歡酒上歌。影移聲復間，遲暮兩如何。

送蘇合宮五官頌

前人

都邑羣方首，商身萬俗訛。變風須愷悌，成化佇絃歌。疇

昔珪璋友雍容文雅多振纓遊省闈鏘玉宰京河別曲
鸞初下行軒雉尚過百壺飛餞意流詠在人和

岳州別姚司馬紹之制許歸侍

前人

和玉悲無已長沙官不成天從扇枕願人遂倚門情方
外懷司馬江東憶步兵向君棲泊處空嶺夜猿驚

洛橋北亭餞諸刺史

前人

離亭拂御溝別曲舞船樓詔餞朝廷牧符分海縣憂股
肱還入郡父母更臨州扇逐仁風轉車隨零雨流恩光
水上溢榮色柳間浮預待羣方最三公不遠求

餞洛州陸長史再守汾州

蘇頌

河尹政成期為汾昔所推不榮三入地還美再臨時擁
傳雲初合聞鶯日正遲道傍多出餞別有吏人思

餞荊州崔司馬

前人

茂禮雕龍昔香名展驥初水連南海漲星拱北辰居稍
發仙人履將題別駕輿明年徵拜入荆玉不藏諸

送吏部李侍郎東歸

前人

陌上有光輝披雲向洛畿賞來榮扈後別至惜分飛泉
酒含風急山煙帶日微茂曹今去矣人物喜東歸

送光祿姚卿還都

前人

漢室有英台荀家寵俊才九卿朝已入三子暮同來不
授綸為草還同鼎用梅兩京王者宅駟馬日應迴

春晚送瑕丘田少府還任因寄洛中鏡上人

前人

聞道還沂上因聲寄洛濱別時花欲盡歸處酒應春聚
散同行客悲歡屬故人少年追樂地遙贈一霑巾

錢澤州盧使君赴任

前人

聞道降綸書為邦建彩旗政憑循吏往才以貴卿除詞
賦良無敵聲華藹有餘榮承四嶽後請絕二天初關路
通秦壁城池遠晉墟撰期行子賦分曲列侯居別望喧

追餞離言繫慘舒平蕪寒蛩亂喬木夜蟬踈寥泐秋先
起推遷月向移舊交何以贈客至待烹魚

景龍觀送裴士曹

前人

昔日常聞公相第今時變作列仙家池旁坐客穿叢篠
樹下游人掃落花雲雨長疑向函谷山泉直似倒流沙
君還洛邑分明記此處同來閱歲華

東湖臨泛餞王司馬

張九齡

南土秋雖半東湖草未黃聊乘風日好來泛芰荷香蘭
棹無勞速菱歌不厭長忽懷京洛去難與共清光

送楊府李公曹

前人

平生屬良友結綬望光輝何知人事拙相與宦情非別
路穿林盡征帆際海歸居然已多意况復兩鄉違

送宛句趙少府

前人

解巾行作吏尊酒謝離居修竹含清景華池澹碧虛地
將幽興愜人與舊遊踈林下紛相送多逢長者車

送韋城李少府

前人

送子南昌尉離亭西候春野花看欲盡林鳥聽猶新別
酒青門路歸軒白馬津相知無遠近萬里尚為鄰

通化門外送別

前人

屢別榮華改長愁意緒微義將私愛隔情與故人歸薄

宦無時賞勞生有事機離魂今夕夢先繞舊林飛

送別南人還鄉

前人

橘柚南中暖桑榆北地陰何言榮落異因見別離心吾
亦江鄉子思歸夢寐深聞君去水宿結思渺雲林牽綴
從浮事遲迴謝所欽東南行舫遠秋浦念猿吟

送越州裴參軍充使入京

孫逖

日落川景寒離心苦未安客愁西向盡鄉夢北歸難霜
果林中變秋花水上殘明朝渡江後雲物向南看

送周判官往台州

前人

吾宗長作賦登陸訪天台星使行看入雲仙意轉催欽

冰攀璀璨驅傳歷莓苔日暮東郊別真情去不迴
送魏騎曹克宇文侍御判官分按南山

前人

雲雨陽臺路光華驛騎巡勸農開夢土恤隱惠荆人樓
迥吟黃鶴江長望白蘋觀風布明詔更是漢南春

送蘇郎中綰出佐荊州

前人

神仙久畱滯清切佇飛翻忽佐南方牧何時西掖垣高
車自蘭省便道出荆門不見河梁別空銷郢路魂

冬末送魏起居赴京

前人

大名將起魏良史更逢遷驛騎朝丹闕關亭望紫煙西

春色近東觀物華偏早赴王正月揮毫記首年

送李補闕攝御史充河西節度判官

前人

昔年叨補袞邊地亦埋輪官序慙先達才名畏後人西
戎雖獻款上策恥和親早赴前軍幕長清外域塵

送趙評事攝御史監軍嶺南

前人

議獄持邦典臨戎假憲威風從閭闔去霜入洞庭飛篁
竹迎金鼓樓船引繡衣明年拜正月南斗使星歸

廣陵送別宋員外佐越鄭舍人還京

朱紱臨秦望皇華赴洛橋文章南渡越書奏北歸朝樹
入江雲盡城銜海月遙秋風將客思川上晚蕭蕭

韋述

送李著作倅杭州

張諤

輟使空三署題輿泣一方祖筵開霽景征陌值韶光水
陸風煙隔秦吳道路長佇聞敷雅政邦國詠惟康

送孫舍人歸相州

梁陟

盛才傾世重清論滿朝歸作隼他年擊為鴛此日飛比
肩趨日近抗首出郊畿為報清漳水分明照錦衣

峴山亭送朱大遊巴東

孟浩然

峴山南郭外送別每登臨沙岸江村近松門山寺深一
言余有贈三峽爾相尋祖席宜城酒征途雲夢林蹉跎
遊子意眷戀故人心去矣勿淹滯巴東猿夜吟

送韓使君除洪州都督

前人

述德撫荆衡分符襲寵榮往來看擁傳前後賴專城勿
翦棠猶在波澄水更清重推江漢理旋改豫章行邵父
多遺愛羊公有令名衣冠列祖道耆舊擁前程峴首晨
風送江陵夜犬迎無才慙孺子千里愧同聲

同盧明府錢張郎中除義王府司馬海園作

前人

上國山河裂賢王邱第開故人分職去潘令寵行來冠
蓋趨梁苑江湘失楚材預愁軒騎動賓客散池臺

送王昌齡之嶺南

前人

洞庭去遠近楓葉早驚秋峴首羊公愛長沙賈誼愁土
風無縞紵鄉味有查頭已抱沉痾疾更貽魑魅憂數年
同筆硯茲夕見衾裯意氣今何在相思望斗牛

土風集
作土毛

送盧少府使入京

前人

楚關望秦國相去千里餘州縣勤王事山河轉使車祖
筵江上列離恨別前書願及芳年賞嬌鶯二月初

送張子容進士舉

前人

夕曛山照沒送客出柴門惆悵野中別殷勤醉後言茂
林子偃息喬木爾飛翻無使谷風誚須令友道存

送莫氏外甥兼諸昆季從韓司馬入西軍

前人

念汝習詩禮未嘗違戶扃嚴君先早露萬里更飄零坐
棄三冬業行觀八陣形飾裝辭故里謀策赴邊庭壯志
吞鴻鵠遙心伴鶴鶴所從文且武無戰自應寧

三冬業集
作三牲養

送王七尉松滋

前人

君不見巫山神女作行雲霏紅沓翠晚氛氲嬋娟遊入
襄王夢覺後還隨零雨分空中飛去復飛來朝朝暮暮

下陽臺愁君此去為仙尉便逐行雲去不理

送謝錄事之越

前人

青旦江天迥涼風西北吹白雲向吳會征帆亦相隨想
到耶溪日應探禹穴竒仙書倘相示余在北山陲

送杜十四

前人

荆吳相接水為鄉君去春江正淼茫日暮征帆泊何處
天涯一望斷人腸

送孟六歸襄陽

張子容

東越相逢地西亭送別津風濤看解纜雲雨見愁人鄉
在桃林岸江連楓樹春因懷故園意歸與孟家鄰

送客歸吳

李白

江村秋雨歇酒盡一帆飛路歷波濤去家唯坐卧歸島
花開灼灼汀柳細依依別後無餘事還應掃釣磯

送友生遊峽中

前人

風靜楊柳垂看花又別離幾年同在此今日各驅馳峽
裏聞猿叫山頭見月時慙慙一杯酒珍重歲寒姿

送袁明府任長江

前人

別離楊柳青尊酒表丹誠古道携琴去深山見峽迎暖
風花繞樹秋雨草沿城自此長江內無因夜犬驚

杭州送裴大澤時赴廬州長史

西江天柱遠東越海門深去割慈親戀行憂報國心奸
風吹落日流水引長吟五月披裘者應知不取金

送史司馬赴崔相公幕

前人

崢嶸丞相府清切鳳凰池羨爾瑤臺鶴高棲瓊樹枝歸
飛晴日好吟弄惠風吹正有乘軒樂初當學舞時珍禽
在羅網微命若遊絲願託翩翩羽相衝漢水湄

送紀秀才遊越

前人

海水不放眼觀濤難稱心即知蓬萊石却是巨鰲簪送
爾遊華頂令余發馬吟仙人居射的道士住山陰禹穴

尋溪入雲門隔嶺深綠蘿秋月夜相憶在鳴琴

送趙雲卿

前人

白玉一杯酒綠楊三月時春風餘幾日兩鬢各成絲兼
燭唯須飲投竿也未遲如逢渭川獵猶可帝王師

送友人尋越中山水

前人

聞道稽山去偏宜謝客才千巖泉灑落萬壑樹縈迴東
海橫秦望西陵繞越臺湖清霜鏡曉濤白雪山來八月
枚乘筆三吳張翰杯此中多逸興早晚向天台

金陵送張十一再遊東吳

前人

張翰黃花句風流五百年誰人今繼作夫子世稱賢再

動遊吳棹還浮入海船春光白門柳霞色赤城天去國
難為別思歸各未旋空餘賈生淚相顧共悽然

送程劉二侍御兼獨孤判官赴安西幕府

前人

安西幕府多才雄喧喧唯道三數公繡衣貂裘明積雪
飛書走檄如飄風朝辭明主出紫宮銀鞍送別金城空
天外飛霜下蔥海火旗雲馬生光彩胡塞塵清計日歸
漢家草綠遙相待

送儲邕之武昌

前人

黃鶴西樓月長江萬里情春風三十度空憶武昌城送

爾難為別銜杯惜未傾湖連張樂地山逐泛舟行諾
楚人重詩傳謝眺清滄浪吾有曲寄入棹歌聲

同王昌齡送族弟襄歸桂陽

前人

秦地見碧草楚謠對清尊把酒爾何思鷓鴣啼南園子
欲羅浮隱猶懷明主恩躊躇紫宮戀孤負滄洲言終然
無心雲海上同飛翻相期仍不淺幽桂有芳根

送人歸沔南

李頎

梅花今正發失路復何如舊國雲山在新年風景餘春
饒漢陽夢日寄武陵書可惜明時老臨川莫羨魚

送劉主簿歸金壇

前人

與子十年舊其如離別何宦遊鄰故國歸夢是滄波京
口青山遠金陵芳草多雲帆曉容裔江日晝清和縣郭
舟人飲津亭漁者歌茅山有仙洞羨爾再經過

聖善閣送裴迪入京

前人

聖華滿高閣苔色上鈎欄藥草空階靜梧桐返照寒清
吟可愈疾携手暫同歡墜葉和金磬饑鳥鳴露盤伊川
惜東別灞水向西看舊托舍香署雲霄何足難

送竇參軍

前人

城南送歸客舉酒對林巒喧鳥迎風轉春衣度雨寒桃

花開翠幕柳色拂金鞍公子何時至無令芳草闌

送魏萬之京

前人

朝聞遊子唱離歌昨夜微霜初渡河鴻雁不堪愁裏聽
雲山况是客中過關城樹色催寒近御苑砧聲向晚多
莫見長安行樂地空令歲月易蹉跎

送劉高郵稅使入都

祖詠

常聞積歸思昨夜又兼秋鄉路京華遠王程江水流吳
歌喧兩岸楚客醉孤舟漸覺潮初上悽然多暮愁

送薛據之宋州

崔曙

無媒嗟失路有道亦乘流客處不堪別異鄉應共愁我

生早孤賤淪落居此州風土至今憶山河皆昔遊一從
文章事兩京春復秋君去問相識幾人成白頭

送崔員外黔中監選

綦毋潛

持衡出帝畿星指夜郎飛神女雲迎馬荆門雨濕衣聽
猿收淚罷繫鴈待書稀蠻貊雖殊俗知君肝膽微

送章彝下第

前人

長安渭橋路行客別時心獻賦溫泉畢無媒魏闕深黃
鶯啼就馬白日暗歸林三十名未立君還惜寸陰

送賈恒明州兼寄溫張二司戶

前人

越客新安別秦人舊國情舟乘晚風便月帶上潮平花
路西施石雲峯勾踐城明州報兩椽相憶二毛生

送平判官入秦

前人

調遠自安命三年已忘歸同聲願執手驛騎到門扉雲
是帝鄉去軍書謁紫微曾為金馬客向日淚霑衣

送儲十二還莊城

前人

西坂何繚繞青林問子家天寒噪野雀日晚度城鷓寂
歷道傍樹瞳矓原上霞茲情不可說長恨隱淪賒

送祖詠

盧象

田家宜伏臘歲晏子言歸石路雪初下荒村雞共飛東

原多煙火北澗隱寒暉滿酌野人酒倦聞鄰女機胡為
困樵採幾日罷朝衣

送梓州李使君

王維

萬壑樹參天空山響杜鵑山中一夜雨樹杪百重泉漢
女輸寶布巴人訟芋田文翁翻教授不敢倚先賢

送李太守赴上洛

前人

商山包楚鄧積翠藹沉沉驛路飛泉灑關門落照深野
花開古戍行客響空林板屋春多雨山城晝欲陰丹泉
通號畧白羽邱荆岑若見西山爽應知黃綺心

送友人南歸

前人

萬里春應盡三江鴈欲稀連天漢水廣孤客郢城歸鄖
國稻苗秀楚人菰米肥懸知倚門望遙識老萊衣

送孟六歸襄陽

前人

杜門不復出久與世情疎以此為長策勸君歸舊廬醉
歌田舍酒笑讀古人書好是一生事無勞獻子虛

送平澹然判官

前人

不識陽關路新役定遠侯黃雲斷春色畫角起邊愁瀚
海經年別交河出塞流須令外國使知飲月支頭

送孫秀才

前人

帝城風日好况復建平家玉枕雙紋簟金盤五色瓜山

中沽魯酒松下飯胡麻莫厭田家苦歸期遠復賒

送丘為往唐州

前人

宛洛有風塵君行多苦辛四愁連漢水百口寄隨人槐
色陰清晝楊花惹暮春朝端肯相送天子繡衣臣

送孫二

前人

郊郭誰相送夫君道術親書生鄒魯客才子洛陽人組
席依寒草行車起暮塵山川何寂寞長望淚霑巾

送丘為落第歸江東

前人

憐君不得意况復柳條春為客黃金盡還家白髮新五
湖三畝宅萬里一歸人知爾不能薦羞稱獻納臣

送嚴秀才還蜀

前人

寧親為令子似舅即賢甥別路經花縣還鄉入錦城山
臨青塞斷江向白雲平獻賦何時至明君憶長卿

送秘書晁監歸日本國

前人

積水不可極安知滄海東九州何處遠萬里若乘空向
國惟看日歸帆但信風鰲身映天黑魚眼射波紅鄉樹
扶桑外主人孤島中別離方異域音信若為通

淇上送趙仙舟

前人

相逢方一笑相送還成泣祖帳已傷離荒城復愁入天
寒遠山淨日暮長河急解纜心已遙望君空佇立

送綦毋潛

前人

聖代無隱者英靈盡來歸
遂令東山客不得顧采薇
既至君門遠孰云吾道非
江淮度寒食京洛縫春衣
置酒臨長道同心與我為
行當浮桂棹未幾拂荆扉
遠樹帶行客孤城當落暉
吾謀適不用勿謂知音稀

送從叔遊淮南

前人

讀書復騎射帶劍遊淮陰
淮陰少年輩千里遠相尋
高義難為隱明時寧陸沉
鳥夷九州外泉館三山深
席颿聊問罪卉服盡成擒
歸來見天子拜爵賜黃金
忽思鱸魚膾復有滄江心
天寒魚葢渚日落雲夢林
江城下楓

葉淮上聞秋砧送歸青門外
車馬去駸駸惆悵新豐樹
空餘天際禽

送喬林

王昌齡

草綠小平津花開伊水濱
今君不得意辜負帝鄉春
口不言金帛心常任屈伸
阮公惟飲酒陶令肯羞貧
陽羨風流地滄江避世人
菱歌五湖遠桂樹八公鄰
青鳥迎孤棹白雲隨
一身潮從秣陵上月映石頭新
未可逃名利應須在縉紳
汀洲芳杜色勸爾暫垂綸

別劉諝

前人

天地寒更雨蒼茫楚城陰
一尊廣陵酒十載衡陽心
倚

伏不可料悲歡豈易尋相逢成遠別後會何如今身在
江海上雲連京國深行當務功業策馬何駸駸

送李濯遊江東

前人

清洛日夜漲微風引孤舟離腸便千里遠夢生江樓楚
國橙橘暗吳門煙雨愁東南具今古歸望山雲秋

送貞外赴長沙

賈至

攜手登臨處巴陵天一隅春生雲夢澤水溢洞庭湖共
歎虞翻枉同悲阮籍途長沙舊卑濕今古未應殊

長沙別李六侍御

前人

月明湘水白霜落洞庭乾放逐長沙外相逢路正難雲

歸帝鄉遠鴈報朔方寒此別盈襟淚雍門不假彈

送陸協律赴端州

前人

越井人南去湘川水北流江邊數杯酒海內一孤舟嶺
嶠同遷客京華即舊遊春心將別恨萬里共悠悠

苑詩類選卷之二十二



